

Ho hapilwe thepa ya Masepala wa Tswaing le ya khampani ya kaho ka lebaka la sekoloto sa lekgetho se fetang R40m

Tshwane, 27 Phato 2021 – Thepa ya masepala wa lehae wa Tswaing mane provenseng ya North West e hapilwe ke sherifi ka lebaka la sekoloto sa lekgetho sa R30-million se kolotwang Ditshebeletso tsa Lekgetho tsa Afrika Borwa (SARS).

Masepala ona wa lehae, o akaretsang ditoropo tsa Delareyville, Sanieshof le Ottosdal, o fane ka dikgutliso ho SARS empa wa hloleha ho etsa ditefo tsa Lekgetho la Lefa ha o ntse o fumana moputso (PAYE), Levi ya Ntshetsopele ya Boitsebelo (SDL) mmoho le Letlole la Inshoreense ya ho se sebetse (UIF).

Ho se leshwe hona ho bakile sekoloto sa lekgetho sa R30-million.

Ka molao dikhampani tsa praevete, mafapha a mmuso mmoho le beng ba bang ba mesebetsi ba lokela ho hula makgetho ana ho tswa ho basebetsi ba bona mme ba fetisetse ditjhelete tsena ho SARS.

Tabeng e nngwe, sherifi o hapile thepa ya khampani ya kaho e *bitswang Independant Minds 107 (PTY) Ltd* ka mora hore e fane ka dikgutliso tsa PAYE, UIF le SDL ntle le ho etsa tefo. Tjhelete e kolotuwang ke khampani ena ke R 10-million

Khomishenara ya SARS Edward Kieswetter o hlahisitse “ho kgathatseha haholo ke ho se ikobele tefo ya lekgetho ka boomo. SARS ha e sa na boikgethelo bo bong ntle le ho sebedisa molao ho tobana le balefalekgetho bana ba sa ikobeleng”.

Mehato ena e tshehetsa maikemisetso a mawala a mokgatlo e leng ho nolofalletsa balefalekgetho ba ikobelang tefo ya lekgetho dintho, empa e tla thafalletsa le ho etsa hore ditjeo e be tse hodimo bakeng sa balefalekgetho ba sa ikobeleng boitlamo bona ba bona.

"SARS e ikemiseditse ho tsumula ka metso tlwaelo ena e seng e jele setsi ka hara boetapele ba dikhampani ya ho se faele le ho fana ka dikgutliso mmoho le ho se etse tefo. Boitshwaro bona bo tjena bo nonyetse mokotla wa naha mme ke tsela e leeme ho balefalekgetho ba bang ba ikobelang tefo ya lekgetho."

O phethetse ka hore "SARS e tsepamisitse maikutlo a yona hodima tlwaelo ena mme bohle ba etsang sena ba tsebe hore re ka se iphapanye le sena, ho sa natswe hore sena se etswa ke khampani efe. Le ha SARS e dula e le malala-a-laotswe ho buisana ka ditlhophiso tsa tefo, e tla sebetsa ntle le letswalo kapa leeme kgahlano le balefalekgetho ba lomahantseng meno ba sa batleng ho etsa se nepahetseng. Ena ke temoso bakeng sa bohle ba ikemiseditseng ho se ikobele tefo ya lekgetho." ho rialo Mong. Kieswetter.

Ho fumana lesedi le fetang lena, ikopanye le SarsMedia@sars.gov.za